

Chalandamarz 2021

28.02.2021 (AdC)

Cul cumanzamaint da favrer haun ils scholars e las scholaras pudieu schlupper la geischla düraunt las posas. Causa cha'ls scholars haun già püssas voutas gieu l'occasiun da's participar ad ün cuors da giaschler, haun mats e mattas musso eir quist an cun grand ingaschamaint e plaschair lur savair.

Düraunt las lecziuns da chaunt e musica vainsa adüna darcho chanto culs scholars e las scholaras illas differentas classas las chanzuns da Chalandamarz. S'inclegia resguardand las reglas da restricziun!

Per cha la populaziun da S-chanf possa eir ella giodair il chaunt vainsa lascho tadler las chanzuns da Chalandamarz registredas davaunt la vaidrina da l'entreda da la scoula grazcha duos amplifichaduors.

La vaidrina vainsa garnieu insembel culs scholars e las scholaras cun plumpas, blusas, fazöls, rösas e disegns. Las rösas e'ls disegns haun ils scholars e las scholaras skizzo e culurieu cun granda premura düraunt las lecziuns d'art figürativ.

Per avoir almain ün pô taimpra da Chalandamarz eir l'ultim di da scoula aunz las vacanzas, ho que do in venderdi da posa per mincha iffaunt ün paunin ed üna viennaisa. Duonna Luzia Fontana ho preparo eir quist an e duonna Adele Marugg ho preparo chastagnas cha nus vains servieu cun gramma. Ils scholars, las scholaras e las magistras haun giodieu ün bel aunzmezdi in cumpagnia.

Scu finischun ho que auncha do ün sachin caramellas per minch'iffaunt e mincha magistra. Quellas sun gnidas preparedas dals scholars e las scholaras da 1a e 2a classa düraunt las lecziuns da textil e tecnic.